

Die 'kanon' in die kanon as probleem vir die prediking

TFJ Dreyer

Abstract

The problem of preaching in terms of a 'canon' within the canon

New evidence in scientific research, attempts to prove that Holy Scripture no longer maintain its unqualified position as an authoritative canon. The authority and relevancy of certain books and passages are questioned. There are significant signs that a 'canon' within the canon is already functioning in the preaching of the church. How does this mere fact of a 'canon' within the canon, affects and influences the preaching of today? The paper is an attempt to define the problem and to provide guidelines in handling this contemporary question.

Die kompleksiteit van die probleem van 'n 'kanon' in die kanon word reeds duidelik in die formulering daarvan. Ons het hier te doen met 'n *contradictio in terminis* wanneer die begrip kanon in sy grondbetekenis verstaan word as 'n reël, maatstaf of norm. Die autoriteit van dit wat as maatstaf moet geld, of gegeld het, word nou afhanklik gemaak van 'n verdere maatstaf of riglyn. Die impak van die vraag word hewiger, in die lig van die feit dat hierdie kanon vir eeue in die lewe van die kerk, in 'n sekere sin die gesagvolle spreke van die kerk in die Naam van God, gewaarborg het.

Dit is daarom ook vanselfsprekend dat die teologiese debat rondom die kanonprobleem in die jongste tyd skerp onder die soeklig val. Hierdie debat word gevoer vanuit verskeie teologiese en selfs ook nie-teologiese dissiplines. Verskeie fasette van die vraagstuk, afhange van die perspektief waaruit dit ondersoek is, word aan die orde gestel. In sy geheel is hierdie problematiek en diskussie rondom die kanon van fundamentele belang vir die prediking van die kerk, in elk geval in soverre as wat die prediking pretendeer om gesagvolle spreke van God te wees.

Om die konsekwensies van die vraagstuk rondom die 'kanon' in die kanon vir die prediking te peil en enigsins te probeer beantwoord, is dit noodsaaklik om oorsigtelik enkele kontoere van die probleem te trek.

1. PROBLEEMSTELLING

As vertrekpunt vir die peiling van die probleem is 'n onlangse uitgawe van die Nederlandse tydskrif, *Praktische Theologie*, 'n genoegsame basis. Dié aflewering word in sy geheel gewy aan die dilemma van die 'nuwe canoniciteit'. Die probleem word belig vanuit Protestantse en Roomse visies. Sosiologiese, kommunikatiewe en prakties-teologiese oorwegings word ter sprake gebring. Vanuit hierdie aflewering as basis, en vanuit die mening van enkele ander teoloë kan die probleemstelling vir die prediking voldoende omlyn word.

1.1 Selektiewe lees van die Bybel

Van den Hoogen (1986: 421) vat die probleem saam met twee tradisioneel geykte uitdrukkings uit die omgangstaal, naamlik 'voor mij staat vast . . .' of 'naar mijn beste weten . . .' Waar dit vroeër as vanselfsprekend geld het dat jy, met die Bybel as kanon in die hand, alles gesagvol kon fundeer omdat dit vas gestaan het, pleit hy vir 'n groter versigtigheid en openheid wat hy dan onder woorde probeer bring met die uitdrukking 'naar mijn beste weten . . .' Hy fundeer sy poging tot meer openheid gewoon op grond van die werklikheid dat mense die Bybel selektief lees. Hy haal Käsemann aan wat gesê het dat die Nuwe Testamentiese kanon alle bestaande konfessies, selfs ook sektes en dwaalleringe, kan fundeer. Mense se posisie in die kultuur en samelewing is medebepalend in hulle selektiewe lees van die Bybel (Van den Hoogen 1986: 422). Firet (1986: 417) wys ook daarop dat verskillende kanones aangewys kan word in bepaalde teologiese tradisies:

Dat gebeurt mn wanneer er krisissituasies zijn waarin de oorsprong en de opdracht van de christelijke gemeenschap om nieuwe bezinning vraagt. Veel basisgemeenschappen verstaan het christen-zijn in de lijn van de 'profeten'. Feministiese teologie pleit vaak voor een herwaardering van de wijsheidstraditie. In bepaalde liturgieën is een duidelijke voorkeur voor de synoptiese Jesus aanwesig.

Die selektiewe lees van die Bybel kan dus daarin manifesteer dat sekere gedeeltes van die kanon op 'n bepaalde tyd vir 'n sekere groep gelowiges meer gesag het as ander. Sy betoog kulmineer in die vraag na 'n groter toleransie in die kanonopvatting wat hy onder woorde bring in terme van sogenoemde 'ondergrenzen' en 'bovengrenzen' (Van Den Hoogen 1986: 424–426).

Dit is verder ook 'n algemene verskynsel in die Christelike kerk dat die Bybel in perikope gelees word by wyse van vrye keuses ten opsigte van die gedeelte wat gelees word in die erediens, tydens pastoraat, huisgodsdien, ensovoorts. Hierdie keuses word telkens beïnvloed deur verskeie faktore soos persoonlike voorliefde vir bepaalde gedeeltes of corpi in die Skrif, of die situasie waarbinne die lesing plaasvind. Hierdie willekeurigheid en ongekontroleerdheid by die seleksie van Skrifgedeeltes blyk duidelik as preke van predikante ontleed word. Sommige boeke van die Bybel kom nooit in die prediking aan die orde nie. Elke predikant het ook weer sy eie voorliefde vir bepaalde gedeeltes van die Bybel. Die vraag ontstaan dus of die kanon slegs in sy totaliteit gesagvol is; of waarborg die kanon ook die gesag van elke afsonderlike teks; of is die kanon slegs 'n aanduiding van die totale omvang van tekste wat vir Christene as Heilige Skrif geld (Van Den Hoogen 1986: 477)?

'Canon in de canon' zou ik eerst willen omschrijven, en wel als een materieel-kwalitatiewe selektie uit de Bijbel die in een of meerdere deeltradities van het christendom als fundament van de Schrift geld, en daarom haar gezagt onderbouwt. Wanneer het vandaag de dag over nieuwe canoniciteit gaat, is deze materieel-kwalitatiewe selektie een veel belangrijker diskussiepunt dan de vraag naar de formele canon (Van Den Hoogen 1986: 483).

Met hierdie uitspraak word die vraag na die sogenaamde sentrum en periferie aan die orde gestel. Watter norm word aangelê by die seleksie en vasstelling van dit wat uiteindelik sal geld as 'kanon' binne die kanon?

1.2 Sentrum/periferie

Die sentrum/periferie-benadering van die kanon veronderstel dus dat sekere uitsprake van die Skrif nader aan die sentrum van die kerninhoud van die Skrif lê en dus meer gesagvol is as ander uitsprake wat verder op die periferie geleë is en minder gesag dra. Dit veronderstel dus dat daar 'n hiërargie van waarhede is, soos wat dit ook inderdaad in die Rooms-Katolieke teologie geformuleer word. Witte (1986: 445–462) stel dat dit gaan om die ordening van die reliëf van waarhede in die Skrif. Sedert Vaticanum II kom hierdie vraag ter sprake onder die trefwoord van die hiërargie van waarhede. Hierdie dilemma word op

die spits gedryf die oomblik as gevra word na die hermeneutiese sleutel wat gebruik word in die vasstelling van hierdie hiërargie. Op grond van die uitsprake van Vaticanum II en die postkonsilêre verwerking daarvan, stel Witte (1986: 459) twee beginsels wat moet geld as hermeneutiese sleutels, naamlik: Hoe naby is hierdie uitspraak geleë aan die Christologies-trinitêre sentrum van die geloof, wat hy beskou as Jesus se dood en opstanding; of, in die tweede instansie, die vraag na die universaliteit of partikulariteit van 'n geloofswaarheid, wat hy noem die 'hiërargie van concilies'. Beide hierdie kriteria geld respektiewelik as 'n wedersydse toetsing.

Pelser (1988) toon aan dat verskeie pogings aangewend is in die vasstelling van 'n kriterium of kriteria om hierdie hiërargie te bepaal of die sentrum vas te stel. Hy kom egter tot die gevolgtrekking dat die verskillende pogings elkeen weer mank gaan aan bepaalde eensydighede en gebreke. Daarom stel hy (1988: 396):

Daar kan streng gesproke nooit 'n absolute kanon of 'n slegs één hermeneutiese sleutel wat vir eens en vir altyd geld nie . . . Dit is nooit staties nie, nooit vas geformuleer nie maar dinamies – skeppend . . . Dit kan daarom nooit besit word, of as 'n losstaande grootheid naas die uitwerking daarvan op die gelowige funksioneer nie.

Die probleem van die kanon in die kanon word dus ook nie simplisties opgelos deur die vind van 'n hermeneutiese sleutel om te onderskei tussen sentrum/periferie of hiërargie van waarhede nie.

1.3 Kanon en die kontingente situasie

Historiese ondersoek na die kanongeskiedenis wys steeds meer en meer op die feit dat die kontingente situasie telkens invloed uitgeoefen het wanneer oor kanonafgrensing beslissings gemaak is. Venter (1987: 755–768) wil die noodsaak aantoon van die historiese navorsing van die kanonvorming.

Die omstandighede, persone en gemeenskappe wat meegewerk het in die aanvaarding en deurgee van 'n kanondeel, word so nagegaan. Tussen die drie interaktiewe pole van kanonhermeneutiek; die teks of tradisie en die situasie waaronder die tradisie hanteer is en die kanonvorming dus plaasgevind het, behoort daar na vore te kom 'a permissable hermeneutic range that indicates what is hermeneutically

fair, according to the canonical process, to use in the believing communities today in representing and resignifying a biblical tradition or text to address new problems' (Venter 1987: 767).

Sodra die wêreld en situasie verander, ontstaan die hermeneutiese probleem: Hoe moet ons die Skrif uitlê in hierdie nuwe situasie. Die gesag van die Skrif of dele van die Skrif kom dus in elke nuwe situasie weer onder die soeklig. Vroom (1986: 428), aan die hand van voorbeelde ter stawing, kom ook tot die gevolgtrekking dat nuwe omstandighede telkens neerslag vind in 'n poging tot herinterpretasie van die geloofgoed en die moraal, tot 'n ander formulering van die kern van die geloof ('kanon' in die kanon). Firet (1986: 521) is ook daarvan oortuig dat in die historiese proses van kanonvorming die uiteindelijke kanon tog ook weer die karakter dra van 'n kompromie tussen verskillende regionale kanones, wat weer die resultate is van 'n eie teologiese tradisie en die eie situasie van die groep.

Daar is dus redelike eenstemmigheid oor die feit dat die historiese situasie telkens meegesprek het in die vasstelling van die kanon. As vanselfsprekend dring die vraag hom dus op in hoeverre die situasie moet meesprek as daar dan sprake is van 'n herevaluering van die gesag van die kanon vir vandag. Hierdie wisselwerking kan daartoe aanleiding gee dat die kontigente situasie uiteindelik normatief word vir die kanon. Aanduidings van hierdie normatiewe waarde van die situasie vir die kanon kom duidelik na vore in die siening van Thung (1986: 463–475). Vanuit sosiologiese oorwegings sien hy die kerk as 'n vrywillig-normatiewe organisasie en konkludeer dan dat wanneer waardes en opvattinge in die maatskappy verskuif, daar deur die lede van die organisasie druk op die leiding uitgeoefen sal word om aanpassings te maak. Hy wil die kanonprobleem beantwoord deur in plaas van die kanon, 'n morele beraad in te stel wat dan feitlik op die beginsel van die grootste gemene deler sal aandui in welke mate geloofswaarhede herinterpreteer moet word. In hierdie siening word die kanon uitgelewer aan die eise van die situasie.

Wanneer daar dus uitgegaan word van die standpunt dat die situasie moet meesprek in die debat oor die 'kanon' in die kanon, is die gevaar van kapitulasie voor die eise van die situasie nie uitgesluit nie.

1.4 Die vraag aan die prediking

Die debat oor die kanon in die kanon is nog lank nie versadig nie. Nuwe vrae en oplossings word vanuit verskillende dissiplines aange-

bied. Dit is 'n vraagstuk wat primêr op teologies-akademiese vlak uitgemaak sal moet word. Intussen staan die kerk voor die werklikheid dat, nie teenstaande die kompleksiteit van vrae en probleme, die prediking van die kerk moet voortgaan. Die konsekwensies van die bevraagtekening van die gesag van die kanon vir die prediking is legio. Vir die doel van hierdie ondersoek word die probleem vir die prediking gereduseer tot die drie fasette, naamlik:

- selektiewe lees van die Bybel
- sentrum periferie, en
- die invloed van die eietydse situasie.

Indien die kerk enigins op 'n verantwoordelike wyse met sy prediking wil voortgaan, sal riglyne vir die volgende vrae gevind moet word:

- As aanvaar word dat die selektiewe lees van die Bybel vir die prediking in werklikheid neerkom op 'n 'kanon' in die kanon, op welke wyse kan dit georden word?
- Indien die oorvloedige gegewens vanuit die Bybelwetenskappe aanvaar word dat daar onafwendbaar kennis geneem moet word van 'n sentrum/periferie of 'n hiërargie van waarhede binne die kanon, hoe gaan die kerk dit vermy dat die prediking as gesagvolle spreke in die Naam van God, in sy wese aangetas word?
- In hoeverre kan die kerk in sy prediking die situasie laat meespreek, sonder dat die situasie normgewend word vir die prediking self?

Op hierdie en verwante vrae sal ons vanuit homiletiese gesigspunt enkele riglyne probeer trek.

2. IMPLIKASIES VIR DIE PREDIKING

Sonder om in diepte in te gaan op elk van die genoemde drie fasette van die vraagstuk van die 'kanon' in die kanon, wil ons hier bloot uitgaan van die veronderstelling dat dit as vraag en probleem aan die prediking gestel word. Die prediking van die kerk moet intussen nie teenstaande die mynveld van probleme en gevare wat onder die oppervlak van die vraagstuk lê, sy voortgang hê. Daar moet dus gesoek word na bakens wat as peilers kan dien om die gevare te vermy, of in elk geval te verminder.

2.1 Prediking en die selektiewe lees van die Bybel

Alhoewel die probleem van die selektiewe lees van die Bybel nie in die homiletiek bekend was vanuit die perspektief van die vraagstuk van die 'kanon' in die kanon nie, is dit tog reeds vanuit 'n ander hoek 'n eeu-oue vraag. Dit gaan hier naamlik om die vraag na die mate van vryheid en willekeur wat die prediker het in sy keuse van preekstof. Dit was nog altyd vir die homiletiek 'n probleem in watter mate die prediker in sy vryheid beperk moet word. Die kanonvraagstuk het slegs hierdie probleem in 'n ander raamwerk gestel, naamlik dat die keuse van preekstof, bewustelik of onbewustelik, die resultaat kan wees van die prediker se eie 'kanon' in die kanon, wat hy daarop nahou.

Die kern van die probleem wat hom aan die homiletiek opdring, is watter betekenis die kanon in sy totale omvang vir die prediking het? As ons die kanon sou verstaan as dié versameling geskrifte wat vir die Christelike kerk as Heilige Skrif geld (NGB Art 4), en tegelyk ook as die bron en basis van die geloof (NGB Art 5), is dit ook vanselfsprekend dat hierdie kanon die bron en norm vir die prediking sal wees. Dit sou ook by implikasie beteken dat die kanon in sy geheel in die prediking aan die orde moet kom. Dit is blykbaar ook die bedoeling van die kerk as hy in die Kerkwet bepaal: 'Die dienaars van die Woord lê die hele Skrif in sy volle betekenis uit in die prediking en neem daarby die indeling van die kerklike jaar in ag' (Nederduitsch Hervormde Kerk 1986 = NHK 1986). Sou die bedoeling hiervan wees dat elke boek van die Bybel en by implikasie elke teksvers in die prediking aan die orde moet kom, of dat die betekenis van die boodskap van die Skrif in sy geheel in die prediking vergestalt moet word? Dit wil tog lyk asof die bepaling die moontlikheid ooplaat dat die aksent nie soseer val op die hele Skrif, bedoelende elke teksvers nie, maar die hele Skrif, bedoelende in sy volle betekenis. Hierdie vermoede word bevestig deur die verdere kwalifikasie dat die indeling van die kerklike jaar daarby in ag geneem moet word. Die indeling van die kerklike jaar wil voorskriftelik wees, nie ten opsigte van bepaalde gedeeltes uit die Skrif, of die totale omvang van die Skrif nie, maar wil juis verseker dat die belangrikste heilsgesbeure in hulle betekenis aan die orde sal kom. Volgens hierdie bepaling kan dus gestel word dat die betekenis van die kanon vir die prediking nie geleë is in die eis dat die kanon volledig (boek- of versgewys) in die prediking tereg sal kom nie, maar wel volledig in die sin dat die volle heilsbetekenis soos vervat in die kanon, verkondig sal word.

In die lig van bogenoemde is daar dus reeds in die bepalings van die Kerkwet duidelike tekens van 'n 'kanon' in die kanon. Hierdie aksentuering vind plaas aan die hand van sekere heilsgebeure wat in die bepalings rondom die kerklike jaar nader uitgespel word. Enersyds het die prediker dus die vryheid om vanuit die kanon preekstof te selekteer, maar aan die ander kant is sy vryheid gebonde aan 'n 'kanon' in die kanon by wyse van die temas uit die kerklike jaar. Dit was blykbaar nog nooit vir die kerk 'n probleem dat die hele kanon (boek- en teksgewys) nie in die prediking behandel word nie. Die kerk is egter wel besorg dat die volle betekenis (heilsbetekenis) van die Skrif as kanon verkondig sal word.

In die geskiedenis van die prediking was daar wel verskeie pogings om te verseker dat die kanon in sy geheel as versameling van geskryfte behandel sal word. Spore hiervan is reeds in die sinagogediens aanwesig, waar op die wyse van die 'lectio continua' gedeeltes uit die Tora en Profete gelees word. Die vroeg-Christelike kerk het in sy erediens die sinagoge gevolg in die sin dat beide Ou en Nuwe Testament gelees word. Reeds in die vyfde eeu kom die sogenaamde 'lectionarum' na vore met '... een verzameling van pericopen voor de over-niet-veelstof beschikkende predikers' (Dijk 1955: 158).

Dit het later uitgeloop op die perikope-sisteem by Luther. Die motivering van Luther vir die invoering van die perikope-sisteem was volgens Dijk (1955: 158) nie soseer om die predikant te beperk ten opsigte van sy vryheid van tekskeuse nie, maar om minder begaafde dominees in hulle prediking behulpsaam te wees. Dit het later gegroei tot 'n perikope-dwang, waarteen baie verzet na vore gekom het (Dijk 1955: 159). 'n Kenmerk van die reformatoriese prediking was dat die preek die vorm van 'n homilie aanneem, waarin die Skrifgedeelte op 'n analitiese wyse vers vir vers verklaar word (De Klerk 1977: 37). Hierdie wyse van prediking was uiters geskik vir boekprediking waar 'n hele Bybelboek op dié manier deurgewerk kon word. Veral Calvin en later Bullinger is bekend vir die feit dat feitlik die hele Bybel só deurgespreek is (Dijk 1955: 158).

Daar was egter deur die geskiedenis, en veral in die jongste tyd, pleitbesorgers vir die vryheid van die prediker in sy keuse van preekstof. Dit is interessant om daarop te let dat byvoorbeeld Karl Barth self in sy homiletiek 'n voorstander is van gebondenheid in tekskeuse deur middel van die perikoopsisteem (Barth 1966), maar tog in sy eie prediking hom groot vryheid veroorloof in sy tekskeuse (Dreyer 1987: 131). Die pleitbesorgers vir die vrye keuse van 'n teks het wyd

uiteenlopende motiverings. Jonker (1976: 68–72) is van mening dat die predikant in sy eie gelowige en teologies-wetenskaplike omvang met die Skrif, deur die Woord in 'n bepaalde teksgedeelte aangespreek word en eers dan kan daardie teksgedeelte weer preekteks word. De Klerk (1977: 102–105) pleit dat naas die voorskrifte van die kerklike jaar daar vryheid moet wees omdat rekening gehou moet word met aktuele toestande en situasies in die gemeente, omdat dit ruimte bied vir die individualiteit en selfwerksaamheid van die prediker en omdat die amptelike aard van die prediking verplig tot die selfstandige Woordbediening. Thomas (1976: 35) sê in dié verband:

In verband met de tekstkeuze kan men zich noch afvragen of over elke Bijbelperikoop geprekeet kan worden.

Afgezien van het feit dat het in de praktijk niet gebeurt, en ook afgezien van de vraag of het ideëel gezien zou moeten zijn er enkele beperkende factoren te noemen, namelijk:

- preken is slechts een bepaalde manier van omgaan met de Bijbel naast tal van andere . . .
- slechts een beperkt aantal perikopen ligt binnen ons bereik . . .
- die tekskeuze wordt als tekstkeus-in-relatie-tot-de-gemeente bovendien beperkt door de vraag: Is dit Bijbelgedeelte voor de gemeente herkenbaar, of herkenbaar te maken.

Uiteindelik, sê hy, begin die tekskeuse by die Skrif self want deur die werking van die Heilige Gees is dit nie 'n vraag wat ons vind nie, maar wat ons in ons besigwees met die Skrif gegee word om te vind. Tereg merk Dijk (1955: 164) ook op ' . . . al is alle Schrift door God ingegeven, en al hebben we door heel die Schrift met de openbaring Gods te doen, niet alles is preekbaar . . . '

Al sou die hele Bybel met al sy boeke en teksverse dus as kanon vir die kerk en daarom ook as bron en norm vir die prediking geld, beteken dit nie noodwendig dat die hele kanon fisies geprekeet moet of kan word nie. Daar is ruimte en vryheid vir seleksie. Hierdie vryheid word grotendeels aan die prediker oorgelaat. Die vrye tekskeuse kan en is in baie gevalle by predikante in openlike of verborge sin, die neerslag van 'n eie 'kanon' in die kanon. Dit is so omdat tekskeuse beïnvloed word deur die individualiteit van die persoonlikheid van die prediker, sy waarneming en verstaan van sy eietydse situasie, maar ook dié van die teks. Hierdie werklikheid en gepaardgaande risiko's moet nie die kerk dwing tot 'n krampagtige vrees en 'n gevolglike gedwonge en voor-skriftelike inperking van die vryheid van die prediker by sy keuse van

preekstof nie. Die vryheid en risiko's vind tog ook plaas binne die wyer perspektief van die eie inherente dinamiek van Woord en Gees, waaronder die prediker leef en tekskeuses maak.

Tereg het die kerk myns insiens die vryheid nie ingeperk ten opsigte van die keuse van teksgedeeltes nie, maar wel die vryheid van die prediker ingeperk ten opsigte van die belangrikste temas uit die heilsgesbeure wat nodig is vir die volle betekenis en verstaan van die heil. As hierdie voorskrif van die kerklike jaar in die lig van die kanonvraagstuk sou neerkom op 'n 'kanon' in die kanon, moet die kerk dit erken. Deur die erkenning daarvan kan die kerk hom in elk geval weer daarvan vergewis, of dié temas van die kerklike jaar, ter sake en voldoende is om die volle betekenis van die Skrif te verkondig.

2.2 Prediking en die sentrum/periferie vraag

Waarin lê die gesag van die prediking? Indien die gesag van die prediking as Woord van God in die eerste en laaste instansie gesetel sou wees in die gesag van die Skrif as kanon, sal die sentrum/periferie-probleem outomaties ook die gesag van die prediking bevraagteken. Dit is daarom nodig om eers kortliks enkele opmerkings te maak oor die gesag van die prediking.

Die primêre gesag lê vanselfsprekend by die Heilige Skrif, en van daaruit by die prediking as proklamering van die Woord wat in die Heilige Skrif gehoor word (Velthuysen 1985: 367). Dit geld egter ook nie ongekwalifiseerd nie, want die Skrif is tegelyk ook God se woorde in mensewoorde. 'Hoe gebeur dit dan dat ons die Woord van God in die mensewoorde verneem? Dit gebeur wanneer hierdie woorde vir my iets begin sê, wanneer dit my in my eksistensie op 'n onoortreflike manier aanspreek en kwalifiseer sodat dit finale antwoorde op my lewensvrae gee' (Velthuysen 1985: 367). In die verslag *God met ons* (Gereformeerde Kerken Nederland = GKN), word die Skrifgesag uitgedruk as 'n relasionele waarheidsbegrip. Geysler (1985: 121) verduidelik dit so:

Dit wil sê dat die waarheid altyd geken word binne 'n bepaalde relasie, in die raamwerk van die mens by iets anders. Die waarheid van die Skrif kan alleen geken word in die geloof, binne die raamwerk van die verhouding met Jesus Christus die opgestane Heer. Dit beteken nie die prysgawe van die objektiewe waarheid van die Skrif nie, maar hierdie waarheid word in die dialektiese spanning van objektiewe waarheid en subjektiewe

belydenis van die waarheid as 'n eksistensiële waarheid vir my as mens ontdek, vanuit die lewende geloofsverhouding met God.

Vir die prediking het die insigte van die nuwere hermeneutiek, die vraag na die gesag van die prediking in 'n ander lig gestel. Dit was Bohren (1980: 28–43) wat gesê het dat God nie vasgevang is in 'n historiese teks of geskryf nie. Die blote repetering van 'n teks of die eksegeties dissektering van 'n teks in die prediking waarborg nog nie die spreke van God nie. Eers wanneer die lewende God self deur sy Heilige Gees tot spreke kom, is dit prediking. Karl Barth het ook gesê dat die Bybel Gods Woord is '... sofern Gott sie Sein Wort sein lässt, sofern Gott durch sie redet' (Barth 1939: 112). Waar die prediker in sy omgang met die Skrif as historiese teks die Woord van God tot hom hoor spreek in 'n totale nuwe situasie, vind daar 'n versmelting van verstaanshorisonne plaas.

'In hierdie proses waar die prediker as subjek met die teks as objek besig was, vind dan 'n omkering van rolle plaas waar die teks nou as subjek die prediker as objek aanspreek, interpreteer en uitlê' (Pieterse 1979: 114). Dan word die prediking 'n woordgebeure, waarin die lewende Woord van God gehoor word. Juis hierin lê die gesag van die prediking.

Ons het probeer aantoon dat die gesag van die prediking dus nie primêr lê in die gesag van die herhaling van 'n historiese teks nie, maar slegs daar waar dit in die hermeneutiese gebeure, deur die werk van die Heilige Gees, die lewende Woord van God word wat my hier en nou aanspreek.

Wanneer daar dus aan die homiletiek gestel word dat daar die probleem is van 'n sentrum en periferie ten opsigte van die gesag van Skrifwaarde, tas dit nie noodwendig die gesag van die prediking aan nie, omdat die gesag van die prediking nie slegs afhang van die Skrif as kanon nie, maar van die lewende God wat self tot spreke kom in die preekgebeure. Weer eens blyk dit ook dat, soos in die geval van die selektiewe lees van die Bybel, hierdie sentrum/periferie-vraagstuk nie nuut is as produk van die probleem van die 'kanon' in die kanon nie. As van die veronderstelling uitgegaan word dat die Skrif as kanon die gesag van die prediking waarborg en die kanon self die norm vir die prediking is, waarom sou dit dan nodig wees dat die predikant voor sy legitimasie, ook met die oog op die prediking, sy gebondenheid aan die belydenisskrifte verklaar? Pont (1981: 242) verklaar hierdie ondertekening van sy gebondenheid aan die belydenisskrifte, soos volg:

Daarmee word deur die belofte van die proponent die formuliere van enigheid die norm én die reël van die prediking en van sy dienswerk. Dit beteken nie dat die formuliere nou bokant die Skrif op gelyke vlak met die Skrif gestel word nie, maar dat die dienswerk en die prediking van die Dienaar van die Woord binne die grense van die leer sal bly soos die formuliere van enigheid dit uitdruk.

Hieruit kan die afleiding gemaak word dat in gekwalifiseerde sin die belydenisskrifte vir die predikant as 'kanon' in die kanon moet geld. In die konteks van dié diskussie kan die belydenisskrifte ook gedefinieer word as die distillering van die kanon tot die sentrum van geloofswaarhede, wat tegelyk ook die grense vir die prediking aandui. Ter wille van die suiwer leer en die eenheid van die kerk, is dit noodsaaklik dat hierdie afgrensing plaasvind. Hierdie binding aan die belydenisskrifte van die kerk verhinder die prediker om vanuit sy eie 'kanon' in die kanon, self te bepaal wat in die sentrum en wat op die periferie lê. Die belydenisgebondenheid van die prediking beskerm die kerk teen sektarisme en dwaalleringe.

Wanneer die belydenisskrifte binne hierdie raamwerk gedefinieer sou word as 'n 'kanon' binne die kanon, met bindende gesag vir die prediking, moet ook in berekening gebring word dat die vasstelling van die kanon 'n bepaalde historiese situasie op die oog gehad het. Dit is dus legitiem om te vra dat die belydenisskrifte hermeneuties vertolk moet word in 'n nuwe situasie. Voor hierdie uitdaging mag die kerk in sy teologiebeoefening nie terugdeins nie. Met hierdie stelling bepleit ons nie dat die belydenisgebondenheid van die prediking losgelaat moet word nie, want dan is die kerk uitgelewer aan die willekeur van elke predikant, om bewustelik of onbewustelik, self te bepaal wat in die sentrum staan of op die periferie lê. As ons dus pleit vir die behoud van die belydenisgebondenheid van die prediking, as 'kanon' in die kanon, onderstreep dit tegelyk die uitdaging van 'n eietydse vertolking van die belydenisskrifte.

2.3 Prediking en die kontingente situasie

'n Faset van die kanonvraagstuk kom na vore in die feit dat die kerk weer telkens vanuit 'n nuwe situasie die kanon en sy gesag op 'n ander wyse vertolk en verstaan, wat weer lei tot 'n nuwe 'kanon' in die kanon. Deels is hierdie probleem van die prediking reeds beantwoord in die

vorige twee vrae. Die situasie van die prediker spreek immers mee in sy keuse van preekstof. Daarom gebeur dit dat in 'n bepaalde situasie sekere gedeeltes van die Skrif meer relevant en aktueel is, terwyl in 'n volgende gegewe situasie aksente en keuses weer anders val. Hierdie vraag is reeds behandel in 2.1.

Die situasie kan egter ook 'n invloed hê ten opsigte van verstaan van 'n bepaalde gedeelte van die Skrif en eventueel ook die gesag wat aan daardie deel van die kanon toegeken word (vgl 1.1). Die verleentheid waarvoor die prediking weer telkens staan, is wat die verhouding tussen teks en situasie is?

Niet alleen de gemeente en de samenleving, ook de situatie, waarin de kerkganger zich bevindt en de wijze waarop hij zichzelf verstaat is bepalend voor de vertolking van de Bijbelsche boodschap. Reeds in de geschiedenis van de prediking vinden wij hierover aanwijzingen hoewel in de moderne tijd de problematiek veel diepzienniger is uitgewerkt (Jonker 1973: 89).

Die prediking as hermeneutiese gebeure beklemtoon juis die feit dat die eksegeese en die gemeentesituasie in voortdurende wisselwerking met mekaar verkeer (Pieterse 1979: 115). In die meditasie word die verlede van die teks en die hede van die verkondiging saamgesluit.

In praktyk kán dit daarop neerkom dat die teks en sy gesag uitgelewer word aan die situasie van die hoorder, dus dat die huidige situasie in wese mede-konstituerend of selfs deurslaggewend is en so 'n 'kanon' in die kanon vorm. Om hierdie gevaar te vermy of in elk geval te minimaliseer, sal die homileet in sy omgang met die teks en situasie steeds bereid moet wees om aan die teks normatiewe voorrang te gee. Die eksegeese van die teks self sal voortdurend die maatstaf en korrekatuur moet bly vir die gedagtes wat in die wisselwerking tussen teks en situasie loskom (Pieterse 1979: 115). In hierdie opsig geld ook wat in 2.2 gesê is oor die belydenis van die kerk as grens vir die prediking. In die hermeneutiese sirkel van teks, belydenis, situasie, sal die teks en dogma dus ook voortdurend die verskansing wees teen kapitulasie voor die eise van die situasie.

Met hierdie riglyne en bakens in gedagte en met 'n appèl op die verantwoordelikheid van die prediker, kan die prediking gesagvolle spreke van God bly, nieeenstaande die gevare en risiko van 'n 'kanon' in die kanon.

3. PREDIKING AS WAAGSTUK

Vanaf die vroegste tye in die geskiedenis van die kerk is erken dat die prediking vanuit die pretensie dat dit gesagvolle spreke in die Naam van God is, 'n waagstuk is en bly. Moderne navorsing dui telkens nuwe gevare aan en bevraagteken die gesag van die prediking vanuit nuwe perspektiewe. So plaas die vraagstukke van die 'kanon' in die kanon die prediking voor nuwe uitdagings. Dit is uiters noodsaaklik dat die kerk in sy prediking hom vergewis van dié gevare en probleme. Dit mag egter nooit daartoe lei dat die kerk terugdeins vir hierdie waagstuk van die prediking nie; intendeel, dit moet die kerk steeds weer daartoe bring om in sy teologiese besigwees met die Skrif as kanon, so noukeurig moontlik te probeer luister, om die aanspraak van God vir ons tyd daarin te hoor. Hy sal hierdie boodskap wat hy verneem het voortdurend moet toets aan teks, belydenis en situasie en bereid moet wees om homself te laat korrigeer. As hy dit alles klaar gedoen het sal hy vanuit die geloof, en deur die leiding van die Heilige Gees, die waagmoed moet openbaar om te kan sê: 'So sê die Here.'

Die dilemma 'kanon' in die kanon mag nooit die kerk met so 'n krampagtige vrees oorweldig, dat hy sy waagmoed in die prediking verloor nie. Die lewende God van die Woord kan en wil ook in ons tyd gesagvol spreek.

Literatuurverwysings

- BARTH, K 1939. *Kirchliche Dogmatik*, Bd. 1/1. Zurich: Zollikon.
- BARTH, K 1966. *Homiletik: Wesen und Vorbereitung der Predigt*. Zürich: EVZ.
- BOHREN, R 1980. *Predigtlehre*. München: Kaiser.
- DE KLERK, JJ 1977. *Prediking*. Pretoria: NG Kerkboekhandel.
- DIJK, K 1955. *De dienst der prediking*. Kampen: Kok.
- DREYER, TFJ 1987. Die homiletiek van Karl Barth. *HTS* 43, 121–137.
- FIRET, J 1986. Toetstenen voor geloven. *Praktische Theologie. Nederlands Tijdschrift voor Pastorale Wetenschappen* 1986/1, 417–420, 518–531.
- GEREFORMEERDE KERKEN NEDERLAND 1981. *God met ons: Over de aard van het Schriftgezag*. Utrecht: Libertas.
- GEYSER, PA 1985. Die relationele waarheidsbegrip en die Christelike lewe: Die sinodale rapport van die GKN. *HTS* 41, 119–129.
- JONKER, H 1973. *En toch preken*. Nijkerk: Callenbach.
- JONKER, WD 1976. *Die Woord as opdrag*. Pretoria; NG Kerkboekhandel.
- NEDERDUITSCH HERVORMDE KERK VAN AFRIKA. ALGEMENE KERKVERGADERING 1986. *Kerkwet en Bepalings*. Pretoria: NHW Pers.
- PELSER, GMM 1988. Die kanon in die kanon as hermeneutiese probleem. *HTS* 44, 387–402.
- PIETERSE, HJC 1979. *Skrifverstaan en prediking*. Pretoria: NG Kerkboekhandel.
- PONT, AD 1981. *Die historiese agtergronde van ons kerklike reg*. Pretoria: HAUM.

- THOMAS, J 1976. *Hiomiletische hulplijnen*. s'Gravenhage: Boekencentrum.
- THUNG, MA 1986. Nieuwe canoniciteit: Tentatieve sociologische overwegingen. *Praktische Theologie. Nederlands Tijdschrift voor Pastorale Wetenschappen* 1986/1, 463-475.
- VAN DEN HOOGEN, T 1986. Naar ons beste weten . . . *Praktische Theologie. Nederlands Tijdschrift voor Pastorale Wetenschappen* 1986/1, 421-426, 476-502.
- VELTHUYSEN GC 1985. Wat is die Woord van God - Skrif, belydeis, prediking? *HTS* 41, 364-371.
- VENTER, PM 1987. Die kanonbegrip as Bybels-teologiese probleem. *HTS* 43, 755-768.
- VROOM, HM 1986. Het schriftgezag ter diskussie in protestantse kring. *Praktische Theologie. Nederlands Tijdschrift voor Pastorale Wetenschappen* 1986/1, 427-444.
- WITTE, H 1986. Er zullen altijd accenten vallen. *Praktische Theologie. Nederlands Tijdschrift voor Pastorale Wetenschappen* 1986/1, 445-462.